

**Aningaasaqarnermut Ataatsimiititaliap suliaq nr. 01.31.06/08-00377 pillugu marlunngornermi ulloq 30. september 2008-mi aalajangiinera pillugu Naalakkersuisunut ilisimatitsineq.**

(Naalakkersuisut ulloq 25. septem ber 2008-mi ataatsimiinneranni imm. 2f)

**Kontomi pingaarnermi 73.01.08-mi, Ilaasunik angallassinermut tapiissutinut tunngasumi, atugassanngortitsinissaq**

Naalakkersuisut **inassutigaat**,

ukiuni 2008-mi, 2009-mi aamma 2010-mi Royal Arctic Bygdeservice A/S-ip ilaasunik angallassineranut 4.000.000 koruuninik atugassanngortitsisarnissamik Attaveqarnermut, Avatangiisinut Aatsitassanullu Naalakkersuisoq piginnaatinneqassasoq

2008-mi ilaasut najugaqarnerinut aningaasartuutit pillugit Air Greenland A/S-imut isumaqatigiissummut matussutissatut 500.000 koruuninik atugassanngortitsinissamut Attaveqarnermut, Avatangiisinut Aatsitassanullu Naalakkersuisoq piginnaatinneqassasoq.

**Aningaasaqarnermut Ataatsimiititaliap oqaaseqaatai**

Angallannermut tunngasuni sillimmatitut aningaasat ilaasa atugassiissutigineqarnissaat Naalakkersuisut suliami matumani qinnutigaat.

2008-2010-mi Kalaallit Nunaanni ilaasunik angallassineq pillugu Royal Arctic Bygdeservice-mik (RAB) nutaamik isumaqatigiissusiornissamut aningaasat siullermik qinnutigineqarput. Ilaasunik angallassineq RAB-ip usinik assartuutaanik annertunerusumik ingerlanneqassasoq allassimavoq. Taamaalilluni aningaasaliissutinik pisariaqartitsineq pakkersimaarneqarsinnaasoq oqaatigineqarpoq. Tamanna Aningaasaqarnermut Ataatsimiititaliamit akuerineqarsinnaavoq. Aappasaanik illoqarfimmit nunaqarfimmut timmisartuussinerit taamaatiinnarneqartillugit ilaasut unnuinerinut akiliuteqartarnissaq pillugu Air Greenlandimik isumaqatigiissuteqarnissamut aningaasanik qinnuteqartoqarpoq. Siunertamut tassunga aningaasaliinissaq Aningaasaqarnermut Ataatsimiititaliamit ajoriffissaqartinneqanngilaq. Isummernissamulli tunngavissiami allassimavoq isumaqatigiissut taamaattoq 2009 aallarnerfigalugu ukiumut 2 mio. kr.-inik akeqassasoq. Aningaasanulli inatsisissatut siunnersuummi amigartoorutit annertoorujussooreerpu. Tamatuma saniatigut aningaasanut inatsisissatut siunnersuut pillugu isumaqatigiinniarnert suli aallartinngitsut aaqqissuussinermut aningaasanik immikkoortitsinissamut Inatsisartuni partiit siumoortumik pituttornissaat Aningaasaqarnermut Ataatsimiititaliamit kissaatigineqanngilaq, aaqqissuussinermi maannangaaq akuersissutigineqassappat tamanna kingunerisussaammagu. Kiisalu aaqqissuussinerep 2008-mi atuutilereernissaanik akuersissutiginninneq nunatta karsiata aningaasaataanik pingaarnersiulluni tulleriiarinerup ukiumoortumik aningaasanut inatsisissatut siunnersuutini pisarnissaanik inatsisitigut aalajangersakkatut tunngavimmut akerliuvoq. Tamanna tunngavigalugu aningaasaliissuteqarnissamik qinnuteqaatip ilaa tassunga tunngasooq Aningaasaqarnermut Ataatsimiititaliamit akuerineqarsinnaanngilaq.

**Aningaasaqarnermut Ataatsimiititaliap aalajangiinera**

Ukiuni 2008-mi, 2009-mi aamma 2010-mi Royal Arctic Bygdeservice A/S-ip ilaasunik angallassineranut 4.000.000 koruuninik atugassanngortitsisarnissamik Attaveqarnermut, Avatangiisinut Aatsitassanullu Naalakkersuisup piginnaatinneqarnissaa Aningaasaqarnermut Ataatsimiititaliamit **akuersissutigineqarpoq**.

2008-mi ilaasut najugaqarnerinut aningaasartuutit pillugit Air Greenland A/S-imut isumaqatigiissummut matussutissatut 500.000 koruuninik atugassanngortitsinissamut Attaveqarnermut, Avatangiisinut Aatsitassanullu Naalakkersuisup piginnaatinneqarnissaa Aningaasaqarnermut Ataatsimiititaliamit **akuersissutigineqarsinnaanngilaq**.

Inussiarnersumik inuulluaqqusillunga  
Augusta Salling  
Aningaasaqarnermut Ataatsimiititaliap siulittaasua